

## AKASHVANI Kolkata

### Regional News Unit

Date : 08-05-2026

Time : 1-40 PM

DEO : KB

Desk in Charge : SDG

Edit. & Compile : Jayanta Saha

NRT : Anindita B.

Announcement :- আকাশবাণী / খবর পড়ছিঃ-

### বিশেষ বিশেষ খবর -

১/ রাজ্যে নতুন সরকার গঠনের তোড়জোড় শুরু হয়েছে। # বিজেপির পরিষদীয় দলের নেতা নির্বাচনের জন্য কেন্দ্রীয় স্বরাষ্ট্রমন্ত্রী অমিত শাহ্ আজ কলকাতায়, নবনির্বাচিত বিধায়কদের সঙ্গে বৈঠকে বসছেন।

২/ নির্বাচন কমিশন, আগামী ২১ মে দক্ষিণ ২৪ পরগনার ফলতা বিধানসভা পুনর্নির্বাচনের জন্য নতুন সাধারণ পর্যবেক্ষক এবং ব্যয় পর্যবেক্ষক নিয়োগ করেছে।

৩/ ভোট পরবর্তী হিংসা রুখতে নির্বাচন কমিশন, বিভিন্ন জেলায় কড়া পদক্ষেপ নিয়েছে।

৪/ চলতি বছরের মাধ্যমিক পরীক্ষার ফল আজ প্রকাশিত হয়েছে। পাশের হার ৮৬ দশমিক আট/তিন শতাংশ। # ৬৯৮ নম্বর পেয়ে রাজ্যে প্রথম হয়েছে, উত্তর দিনাজপুরের রায়গঞ্জ সারদা বিদ্যামন্দিরের অভিরূপ ভদ্র।

৫/ আবহাওয়া দপ্তর জানিয়েছে, রাজ্যে আগামী রবিবার পর্যন্ত বিক্ষিপ্তভাবে ঝড় বৃষ্টির সম্ভাবনা রয়েছে।

৬/ IPL ক্রিকেটে আজ কলকাতা নাইট রাইডার্স, দিল্লি ক্যাপিটালসের বিরুদ্ধে খেলবে।

\*\*\*\*\*

রাজ্যে নতুন সরকার গঠনের তোড়জোড় শুরু হয়েছে। বিজেপির পরিষদীয় দলের নেতা নির্বাচনের জন্য কেন্দ্রীয় স্বরাষ্ট্রমন্ত্রী অমিত শাহ্, কলকাতার বিশ্ব বাংলা কনভেনশন সেন্টারে নবনির্বাচিত বিধায়কদের সঙ্গে বৈঠকে বসছেন। আজই চূড়ান্ত হয়ে যাবে রাজ্যের পরবর্তী মুখ্যমন্ত্রীর নাম। ব্রিগেড প্যারেড গ্রাউন্ডে আগামীকাল শপথ নেবে নতুন সরকার।

একটি প্রতিবেদন-

(ভয়েসকাস্ট - অভিরূপ)

আজ সকালে কেন্দ্রীয় স্বরাষ্ট্রমন্ত্রী কলকাতায় আসেন। বিমানবন্দরে তাঁকে স্বাগত জানান, দলের রাজ্য সভাপতি শমীক ভট্টাচার্য, কেন্দ্রীয় প্রতিমন্ত্রী সুকান্ত মজুমদার, বিজেপি নেতা শুভেন্দু অধিকারী, নিশীথ প্রামাণিক, দিলীপ ঘোষ সহ দলীয় নেতৃবৃন্দ।

বিমানবন্দর থেকে অমিত শাহ্, দক্ষিণেশ্বর মন্দিরে গিয়ে পূজা দেন।

\*\*\*\*\*

রাজ্যে ক্ষমতার পালাবদলের পর মহাকরণ থেকে পরিচালিত হবে নতুন সরকার। সেই লক্ষ্যে মহাকরণের নিরাপত্তা ব্যবস্থা ঢেলে সাজানোর কাজ চলেছে দ্রুত গতিতে। ইতমধ্যেই সেখানে আরও ৩-শো জন কর্মী নিয়োগের পরিকল্পনা করা হয়েছে। বর্তমানে এই ভবনটিতে ৬০টি ক্যামেরা থাকলেও নিরাপত্তার জন্য আরও ৮০-টি নতুন ক্যামেরা বসানোর সুপারিশ করা হয়েছে। মহাকরণের সংস্কারের কাজও চলেছে জোরকদমে।

\*\*\*\*\*

নির্বাচন কমিশন, আগামী ২১ মে দক্ষিণ ২৪ পরগনার ফলতা বিধানসভা পুনর্নির্বাচনের জন্য নতুন সাধারণ পর্যবেক্ষক এবং ব্যয় পর্যবেক্ষক নিয়োগ করেছে।

ঝাড়খণ্ড ক্যাডারের ২০০৯ ব্যাচের IAS অফিসার মুথুকুমার আলাগুমুথুকে ফলতা কেন্দ্রের সাধারণ পর্যবেক্ষক হিসেবে নিয়োগ করা হয়েছে। তাঁকে ৮ মে-র মধ্যে সংশ্লিষ্ট কেন্দ্রে পৌঁছানোর নির্দেশ দেওয়া হয়েছে। ভোটগ্রহণ, গণনা, ফল ঘোষণা এবং স্ট্রংরুম সিল হওয়া পর্যন্ত তাঁকে দায়িত্বে থাকতে হবে। অন্যদিকে, ব্যয় পর্যবেক্ষক হিসেবে নিয়োগ করা হয়েছে ২০১৪ ব্যাচের IRS অফিসার আর সি মার্ভিকে। কমিশন জানিয়েছে, নির্বাচনী

খরচের উপর নজরদারি, রিপোর্ট সংগ্রহ এবং ভোট প্রক্রিয়া সংক্রান্ত আর্থিক পর্যবেক্ষণের দায়িত্বে থাকবেন তিনি।

\*\*\*\*\*

ভোট পরবর্তী হিংসার প্রেক্ষিতে, মুর্শিদাবাদে পুলিশ জেলার ২৩টি থানা এলাকায় অশান্তির ঘটনায় যুক্ত থাকা ব্যক্তিদের বিরুদ্ধে তল্লাশি অভিযান চলছে। গত বুধবার রাতে অভিযুক্ত ১৬৯ জনকে গ্রেপ্তার করা হয়। অন্যদিকে, মুর্শিদাবাদের তৃণমূলের হাতে দখল হয়ে যাওয়া দলীয় কার্যালয় পুনরুদ্ধার হয়েছে বলে সিপিএম দাবী করেছে। জিয়াগঞ্জ-আজিমগঞ্জ পুরসভার ১৪ নম্বর ওয়ার্ডের আজিমগঞ্জ বারদুয়ারি এলাকার কার্যালয়, ২০১৭ সাল থেকে তৃণমূল কংগ্রেস দখল করে নেয় বলে অভিযোগ। অন্যদিকে, মুর্শিদাবাদের ইসলামপুরের চকগ্রামে, তৃণমূল কংগ্রেসের জবরদখল করে রাখা এক ব্যক্তির দোকানঘর পুনরুদ্ধার করে ঘর মালিককে ফেরত দিলো বিজেপি নেতৃত্ব।

যে কোনোরকম হিংসার ঘটনা রখতে মালদার জেলা প্রশাসন, সবরকমের উদ্যোগ নিয়েছে। এলাকায় শান্তি রক্ষায় কেন্দ্রীয় বাহিনীকে রুটমার্চ করার নির্দেশ দিয়েছেন, জেলা ও ব্লক প্রশাসনের আধিকারিকরা।

\*\*\*\*\*

মুর্শিদাবাদের নওদায় পরিত্যক্ত ইটভাটা থেকে আট জনকে গ্রেফতার করেছে পুলিশ। ধৃতদের বাড়ি ঝাড়খণ্ড, নওদা, হরিহরপাড়া এবং হাওড়ায়। এদের মধ্যে আছে, ইটভাটার মালিক, নওদা ব্লকের তৃণমূল কংগ্রেসের সভাপতি সফিউজ্জামান শেখ ও তাঁর এক আত্মীয়ও।

জানা গেছে, গতকাল বিকেলে ওই ইটভাটায় ভিন রাজ্যের একটি ট্রাক, অপর একটি গাড়ির সঙ্গে নম্বরপ্লেট বদল করেছে বলে খবর পায় পুলিশ। কেন্দ্রীয় বাহিনীকে নিয়ে সেখানে অভিযান চালিয়ে একটি ট্রাক, একাধিক মোটরবাইক, চেসিস পাঞ্চিং মেশিন, ল্যাপটপ, চেসিস ও নম্বর প্লেট-সহ বেশ কিছু যন্ত্রপাতি বাজেয়াপ্ত করে।

\*\*\*\*\*

ঝাড়খন্ড থেকে মুর্শিদাবাদের ফারাক্কা যাওয়ার পথে ১০ কুইন্টাল চোরাই কয়লা বোঝাই একটি ইঞ্জিগলিত ভ্যান আটক করেছে পুলিশ। গ্রেপ্তার করা হয়েছে ভ্যান চালক সন্তোষ ঘোষকে। তার বাড়ি ফারাক্কার কাশিনগরে। পুলিশ জানিয়েছে, বুধবার রাতে কয়লা বোঝাই ওই ভ্যানটিকে ঝাড়খন্ড-ফারাক্কা সড়কে আটক করা হয়।

\*\*\*\*\*

চলতি বছরের মাধ্যমিক পরীক্ষার ফল আজ প্রকাশিত হয়েছে। মোট পাশের হার ৮৬ দশমিক আট/তিন শতাংশ। এবার পরীক্ষা দিয়েছিল ৯ লক্ষ ৭১ হাজার পরীক্ষার্থী।

কালিম্পং জেলা, পাশের হারে ৯৫ দশমিক পাঁচ/এক শতাংশ নিয়ে রাজ্যের মধ্যে প্রথম স্থানে রয়েছে। ৯৪ দশমিক আট/দুই শতাংশ নিয়ে দ্বিতীয় স্থানে পূর্ব মেদিনীপুর, ৯২ দশমিক তিন/এক শতাংশ নিয়ে তৃতীয় স্থানে কলকাতা এবং চতুর্থ স্থানে রয়েছে পশ্চিম মেদিনীপুর। আনুষ্ঠানিকভাবে ফল ঘোষণা করে মধ্যশিক্ষা পর্ষদের সভাপতি রামানুজ গঙ্গোপাধ্যায় সাংবাদিকদের জানান, প্রথম দশে আছে ১৯টি জেলার ১৩১ জন পড়ুয়া। প্রথম তিনে রয়েছে ৫ জন।

এ'বছর ৬৯৮ নম্বর পেয়ে রাজ্যে প্রথম স্থান অধিকার করেছে, উত্তর দিনাজপুরের রায়গঞ্জ সারদা বিদ্যামন্দিরের ছাত্র অভিরূপ ভদ্র। সে সফটওয়্যার ইঞ্জিনিয়ার হতে চায়। পরিশ্রম ও আত্মবিশ্বাসই, তার সাফল্যের চাবিকাঠি বলে মন্তব্য করেন সে। ( বাইট- ফাস্ট বয় /অভিরূপ ভদ্র )

৬৯৬ পেয়ে দ্বিতীয় হয়েছে বীরভূমের সরস্বতী শিশু মন্দির হাই স্কুলের ছাত্র প্রিয়তোষ মুখোপাধ্যায়। তৃতীয় স্থানে আছে, তিনজন। তাদের প্রাপ্ত নম্বর ৬৯৫। এরা হল- বাঁকুড়া ক্রীশ্চান কলেজিয়েট স্কুলের ছাত্র মৈনাক মণ্ডল, নরেন্দ্রপুর রামকৃষ্ণ মিশনের সৌর জানা, পূর্ব মেদিনীপুরের রামকৃষ্ণ শিক্ষা মন্দিরের অক্ষয় কুমার জানা।

\*\*\*\*\*

মাধ্যমিকের সঙ্গে হাই মাদ্রাসা, আলিম ও ফাজিলের রেজাল্ট প্রকাশিত হবে আজ। দুপুর আড়াইটার পর থেকে বিভিন্ন মাদ্রাসার প্রতিনিধিরা জেলার ক্যাম্প অফিস থেকে মার্শিট ও শংসাপত্র সংগ্রহ করতে পারবে।

<https://www.wbbme.org> ওয়েবসাইটে হাইমাদ্রাসা, আলিম ও ফাজিলের ফল দেখা যাবে।

\*\*\*\*\*

বাতাসে জলীয় বাষ্পের পরিমাণ বেশি থাকার কারণে আগামী রবিবার পর্যন্ত রাজ্যের বিক্ষিপ্তভাবে ঝড় বৃষ্টির সম্ভাবনা রয়েছে। সোমবার থেকে তা অনেকটাই কমে যাবে। তবে আগামীকাল কলকাতা ও পার্শ্ববর্তী এলাকায় দুপুরের পর ঝড় বৃষ্টির সম্ভাবনা।

একটি প্রতিবেদন- ( ভিসি কাশফিন )

এদিকে, আজ কলকাতায় সর্বনিম্ন তাপমাত্রা ছিল ২০ দশমিক ২ ডিগ্রী সেলসিয়াস, স্বাভাবিকের থেকে যা ৬ দশমিক ৬ ডিগ্রি কম।

\*\*\*\*\*

IPL ক্রিকেটে আজ কলকাতা নাইট রাইডার্স, দিল্লি ক্যাপিটালস-এর বিরুদ্ধে খেলবে। দিল্লির অরুণ জেটলি স্টেডিয়ামে খেলা শুরু হবে সন্ধ্যা সাড়ে সাতটায়।

কেকেআর ৯ ম্যাচে ৭ পয়েন্ট সংগ্রহ করে পয়েন্ট তালিকায় অষ্টম স্থানে রয়েছে।

\*\*\*\*\*